

NAMBA TU PAS DOUK JON NENEKAS ULI

Banenyi balan umu enyudak namba 2 balan Jon neneken uli
ves 1-3 Jon nenehilaumu echech Kristen ali naklipech God ananin yopinyi
balan umu nugakomech.
ves 4-11 Aduligeinyi pasin nyanu enyudak pasin umu apak ulkwip isave
panosuh kipaichimu
12-13 Nyatuh uli balan

¹Yek nebewelimu ipak pasuh God ananin balan uli yeneku balan
asudak pas. Yenekasumagu nyak almatok^a douk God ananatalih-enyu
nyape ananinyaluli nyanu nyakich batowich. Yek adul ulkum manubu
manohwepu. Ali douk wak yek otuwe ulkum munohwepu e, wak.
Chanatimaguk chadukemu aduligeinyi balan chagipechen uli douk
chopuk ulkwip panohwepu. ²Umu moneken, enyudak adulin atinyi balan
doux nyape apak ali eke nyunubu nyupe eheh nyumneh. ³Sapos apak
miyagwleh adulin atinyi balan ali ulkwip punosuh kipahechimu, Aninu
God nunu Jisas Krais apakinu Aninu ananinu Nuganinu eke hunelekapu
hugakomapu meyoh ali hunelekapu apaluh hlulu kalbu.

Apak Imas Mugipech Enyudak Pasin Umu Ulkwip Punosuh Kipahechimu

⁴Yek yanubu yenehilawamu agundak yemnek umu enech nyakich
batowich chagipech aduligeinyi balan umu. Chagipechen kobi Aninu
naklipapu dodogowinyi balan umu mugipechen umu. ⁵Ali nameitu
yek yakli iwemu enen balan ali iklipenyu namudak nyak nyanubu
yopinyali almatok. Apak manatimaguk atin ati imas munubu ulkwip
punosuh umu. Enyudak lo nameitu yaklipenyumen uli, enyen douk wak
iklipenyu enen nupolein lo e, wak. Enyen douk seiwak wata susubati
malawen madukemen uli. ⁶Bawagas umu agundak apak ulkwip punosuh

^a **1:1** Enyudak balan, enech chakli aduligeik almatok kwanu okwokwich batowich. Enech
chakli God ananich elpech douk isave chowachabal chenek lotu anabul wabul uli.

kipahechimu douk namudak. Apak mupemu mugipech God ananin lo. Enyudak lo douk watak susubati ipak panatimaguk pemneken uli. Enyen douk nyakli namudak. Ipak imas punubu ulkwip punosuh kipahechi.

Apak Munubu Musuh Kraiss Ananin Balan Dadag

⁷Wolobaimi almam halahe hanak wolobaigunmu apudak atap uli, amam douk hakli hunek lohmapu. Amam douk hapemu hakli Jisas Kraiss anan douk wo nutoglu adulinyi elpen e, wak. Amudakmali almam douk hapemu henek loh uli. Ali amam douk Kraiss ananim birua. ⁸Ipak punek yologimu kedeke kobi pulau yopichi echudak douk apenek moulamu kwali eke pulawech uli. Wakuli punubu pulawech piyatech umu douk eke kalbu. ⁹Meichi elpech douk wo chunubu chusuh Kraiss ananin balan dadag ali chatukemenyuk chagipech kipainyili, echech douk wo God nupenyich e, wak. Wakuli echebuk douk chanubu chasuh enyudak yopinyi balan dadag uli, nameitu Aninu nanu Nuganinu douk hapenyich. ¹⁰Meichi elpech chunakumagu ipak ali wo chusuh enyudak balan uli e, ipak kobi pulawech chunepu pupe ipakig wilag o pukli pukech loguh punehilau-mech, wak. ¹¹Meichi elpech douk chukli chukech loguh ali chunehilaumu echudakmali elpech uli, echech douk eke chunech atin balan. Ali eke chunech chunechle-pamu yowenyi echech cheneken uli.

Nyagikuk Uli Balan

¹²Yek wolobainyi balan douk yakli inyemumepagu asudak pas uli. Wakuli yakli wak umu inyemagu pas meyoh, wak. Yakli inaku itulipu ali mupe atugun miyagwleh meyoh umu douk eke munubu munehilau mulikuk.

¹³Nyakik owawik^b douk God anatalihok umu kwupe ananik nugawik uli, okwokwich batowich douk chenemenyagu gude nyak.

^b 1:13 Tik futnot umu 2 Jon 1.